

Pretender augment per impedir reducziun

La regenza ed il cussegl grond pretendan dapli engaschi federal per la guardia da cunfin

■ (anr/ac) La regenza grischuna ha annunzià dad avair inoltrà a Berna ina iniziativa dal chantun cun la finamira dad amplificar il corp da la guardia da cunfin. Ina pretensiuin gia inoltrada adumbatten dad auters chantuns. En fin uss è la confederaziun sa dustada per motivs finansials.

Il chantun Grischun na para betg dad esser il sulet chantun che fa squitsch vers la confederaziun dad augmentar il corps da la guardia da cunfin e dad amplifitgar ella cun ils meds necessaris per pudair ademplir las incumbensas adossadas a la guardia. Sco quai ch'il cusseglier guvernativ *Christian Rathgeb* è s'exprimi a chascun da la sesiun dal zercladur 2017 avant il cussegl grond e tenor las explicaziuns da la regenza en la resposta sin ina incumbensa da la deputada *Brigitta Hitz* (pld Curvalda) han ils chantuns Basilea-citad e Basilea-champagna inoltrà iniziativa dals chantuns cun la medema pretensiuin avant dus onns. Dapli ch'in rapport n'han las duas iniziativa dentant betg pudì effectuar. Il parlament federal ha renvià la pretensiuin per motivs finansials, sco i stat scrit en la resposta da la regenza. L'istanza actuala dal chantun Grischun para dad esser coordinada cun il chantun S. Gagl che ha concludì l'avrigl 2017, tenor las explicaziuns dal departament da Rathgeb, ina iniziativa dal chantun praticamain eguala a l'istanza actuala dal chantun Grischun. L'incumbensa da la deputada Hitz datescha numnadamain dal medem temp. Ella è vegnida inoltrada a chascun da la sesiun d'avrigl e discutada ed acceptada dal cussegl grond cun gronda maioritad il zercladur 2017. La regenza grischuna ha



La confederaziun vul spargnar e quai pudess pertutgar la guardia da cunfin. Il chantun Grischun vul impedir ina reducziun dal personal e pretenda schizunt in augment.

FOTO TH. GSTÖHL

sustegnì l'incumbensa ed è stada pronta dad exequir ella.

La confederaziun vul spargnar

Argumentà l'incumbensa per ina iniziativa dals stans ha la deputada Brigitte Hitz tranter auter cun il deficit structural da la confederaziun e l'annunzia da vulair reducir sche betg abolir quest defi-

cit. Menziunà ha la deputada il program da stabilisaziun da la confederaziun per ils onns proxims cun la finamira da spargnar 60 milliuns francs per onn e da stritgar 500 enfin 700 plazzas entaifer dus onns en l'administraziun federala. Per regla reducescha la confederaziun persunal a moda lineara tras tut ils departament ed i saja da quintar ch'ina part da la

reducziun dal personal vegnia realisada tar la segirezza interna, scriva la deputada. E tar quella segirezza interna tutgia il corps da la guardia da cunfin e consequentamain pudessia il corps vegnir reduci. Ina reducziun dal corps da cunfin cuntrafa cumpletamain als basegns e la finamira dal chantun Grischun. Rathgeb ha fatg valair avant il cussegl grond ch'il

corps da cunfin stoppia vegnir amplifitgà independentamain da la situaziun finanziaria da la confederaziun. Uschia na pretenda l'iniziativa dal chantun Grischun betg sulet da mantegnair il status quo, mabain dad augmentar il dumber da persunal tar il corps da cunfin.

Las regiuns da cunfin sa dostan

L'incumbensa da la deputada Hitz che ha manà a l'iniziativa dal chantun n'è betg la suletta intervenziun politica en il cussegl grond che ha tematisà la guardia da cunfin. Las istanzas politicas derivan per regla da la represchentanza politica da las regiuns cunfinantas cun l'exteriur sco per exempel la Val Müstair. Il deputà *Rico Lamprecht* (pbd Müstair) ha gia fatg attent en sia incumbensa dal december 2016 a la retratga da persunal da la guardia da cunfin. El ha scrit che la populaziun saja vegnida confruntada cun signals che cuntrafetschien a la strategia chantunala da cumbatter il turissem criminal e da rinforzar il sentiment da segirezza da la populaziun. Menziunà ha il deputà era l'immigraziun illegala. Lamprecht ha fatg attent a las regiuns grischunas las pli sensibilas sco la Val Müstair, Campocologno e Castasegna. Christian Rathgeb ha alura respondi da vulair s'engaschar energicamain tar la confederaziun e las istanzas federalas per mantegnair l'effectiv da la guardia da cunfin. Per pudair liquidar las sfidas che sajan da schliar. Sfidas ch'era la confederaziun contestescha en ses rapport dal matg 2016. Probablmain è il cusseglier guvernativ sez vegnì a la conclusiun che l'intervenziun energica na tanschia betg ed i saja temp dad augmentar la pressiuin politica.